

典故紀聞
四



典 故 紀 聞

(四)

余 繼 登 輯

王雲五主編
叢書集成初編
典故紀聞
第四冊

中華民國二十五年十二月初版

張

輯者 余繼登

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

典故紀聞卷十五

成化六年順天府尹閻鐸以歲饑坐視民患不能賑濟爲戶科所劾遂降衢州府知府其府丞而下并巡城御史俱加罰有差祖宗朝急於民瘼如此今稍寬矣

太平蕪湖荊州沙市杭州稅課舊無抽分官成化七年工部尙書王復始請添部屬三員分往抽分竹木變銀爲營繕費是年所得僅千兩後至者以多得爲能至萬餘兩歲歲加增朘削無極言利之臣貽害如此

祖宗之世最重封爵如公侯伯皆論功定議蓋積其前後之功無官可酬乃始加之非如千百戶指揮可累級陞也自都督同知趙輔征兩廣回大肆賂遺遂得封伯後太監劉永成姪左都督聚亦以微功得甯晉伯無復舊制而人亦不以得爵爲難矣

大理卿王概爲按察使時以旌異得賜誥命後歷副都御史大理卿以品秩相同不得請給上疏乞恩詔特許之舊制大臣無有兩給三品誥命者有之自概始

北直隸舊止巡撫一人成化八年九月兵科都給事中梁璟言畿內八府境土廣遠巡撫一人兼理邊備卒遇有警恐誤事機乞以河間保定以南六府專委都御史陳濂巡撫其薊州抵密雲一帶邊關及順天永平二府屬另擇重臣一人專督兼理巡撫之任部覆從其言乃以命都御史張綱二巡撫之設自此始

成化時給事中白昂言大理寺審錄有詞稱冤人犯駁回在外衙門再問多偏執己見不與辯明或用非法重刑鍛鍊成獄囚人慮其駁回必加酷刑雖有冤枉不敢再言今後有問招不明擬罪不當者俱乞改調相應官員問理不許鍛鍊成獄違者雖無贓亦依律問罪送吏部改調從之

成化時都御史李賓言在外官司聽斷官民詞訟動輒罰人財物始則暫寄官庫以欺人終則通同庫役以入己又預備稽考告訐假立文簿虛作支銷宜行禁革嚴治其罪從之

成化七年立春以星變避殿御奉天門便服進春免賀

成化八年元旦以星變免慶賀羣臣但具朝服行八拜禮

舊制殿試在三月初一日狀元率進士上表謝恩在初六日成化八年以悼恭太子發引改殿試於十五日至今因之

成化時廣東按察司言婦人犯笞杖并徒罪者例俱單衣的決但其間所犯多緣連累且素懷廉恥之人一被刑辱終身莫雪甚爲可憫乞自後除姦盜不孝與樂婦的決餘悉納鈔贖罪遂著爲令

成化時宣府龍門所火焚官草五十七萬餘有司獲縱火者以聞命卽斬以徇籍其家資以抵草數不足則令經收看守官補之

成化時總督漕運都御史張鵬請給僧道度牒鬻米濟荒憲宗曰僧道給度不宜太濫且鬻米之數所得幾何而所捐於國者多矣其在官吏監生尙不可以爲常況此輩乎其勿許

河東鹽池舊止以巡按巡視。成化九年三月，戶部郎中文志貞言：巡按等官不得以時臨視，故人得私販官鹽，阻壞客商。少中無以濟邊用之急，請歲遣御史一人往彼禁治料理。歲滿更代，如巡茶之例。乃始設河東巡鹽御史。

舊制時享太廟，俱於近午時行禮。成化九年四月初一日，時享太廟，是日日食。百官當揀護，禮部奏請早行廟享禮。

舊制廩膳生員考黜者，仍追食過廩米。成化九年，北直隸提學閻禹錫始奏免還官。

故事四品官父母死，有祭無葬。成化九年八月，少詹事柯潛父死，特賜以葬。時以爲榮。

御史楊守隨言：爵賞不可以無律，名器不可以假人。頃因山東災傷，許辦事及寄名吏納銀免考，悉依資格選用。俸門一開，越次授職，蕩無紀極，爭相黷貨，以規驟進。其於害政，莫此爲甚。憲宗批答曰：朕患吏道不清，嚴考試以爲進退。今若募胥吏入費賑饑，免考登仕，是教吏貪也。御史言是其亟罷此例。按奸吏舞文以貪賄，挾賄以買官，倚官以剝民，故每遇開例，吏之加納者半，吏治不清，民生不遂，多由於此。憲宗此旨，百世所當遵也。

程明道、伊川二先生，祖家保定博野縣人。其五世祖端明殿學士羽，始遷洛陽。成化間，博野知縣裴泰建言，請立祀，命有司春秋祭祀。

成化年間，因擒獲妖人，追其妖書圖本，備錄其名目，榜示天下，以曉諭愚民。其書有番天揭地搜神記經。

金龍八寶混天機神經。安天定世繡瑩關九龍戰江神圖。天空知賢變愚神圖經。鎮天降妖鐵板。達通天
 混海圖。定天定國水晶珠經。金鎖洪陽大策。金鋒都天玉鏡。六甲明天了地金神飛通黑玩書。通天徹地
 照仙鐘經。三天九關夜海金船經。九關亡返纂天經。八寶擎天白玉柱。夫子金地歷。劉大保泄漏天機伍
 公經。奪天冊收門纂經。佛手記。三煞截鬼經。金鎖攔天記。緊關周天烈火圖。玉盆經。換天圖。飛天歷。神工
 九轉玉瓮金燈記。天形圖。天髓靈經。定世混海神珠。通玄濟世鴛鴦經。錦珊瑚。通天立世滾雲裘銀城論。
 顯明歷。金章紫綬經。王賢鏡。四門記。收燕破國經。通天無價錦包袱。三聖爭功聚寶經。奪天策海底金經。
 九曜飛光歷。土傘金華蓋水鑑書。照賢金靈鏡經。硃書符式坐壇記。普濟定天經。周天烈火圖。六甲天書。
 三災救苦金輪經。智鎖天關書。感天迷化經。變化經。鎮國定世三陽歷。玄元寶鏡。玉傘錦華蓋換海圖。轉
 天圖。推背書。九曜飛天歷。彌勒頌。通天玩海珠。照天鏡。玄天寶鏡經。上天梯等經。龍女引道經。穿珠偈。天
 形圖。應劫經。天圖形首妙經。玉賢鏡。透天關盡天歷。玄娘聖母親書。太上玄元寶鏡。降妖斷怪五家經。金
 光妙品。奪日金燈。紅塵三略照天鏡。九關番天揭。天神圖。金鋒都天玉鏡。玉樹金蟬經。玄娘聖母經。七返
 無價紫金船。銀城圖樣。龍鳳勘合。

僧官常琇者。拜故南和伯方瑛爲父。修武伯沈煜。泰甯侯陳桓。豐潤伯曹振。錦衣指揮王珩。皆與交好。琇
 至各家飲酒。皆設鼓樂。琇每招妓與亂。後其徒因與爭寺產。因發其通瑛妾諸罪。遂并下錦衣衛鞠實。琇
 校發遼東充軍。煜桓振珩各坐罪停俸有差。仍命都察院出榜曉示。此真可爲官員交好奸僧之戒也。

成化時。刑部主事張鼎言。固原平涼。乃三邊總會之所。虜寇侵犯。累從此入。宜置立總府。諸臣會議。乃命左都御史王越駐劄固順。總督諸路軍馬。陝西總制始此。

成化時。以街渠汙穢壅塞。爲工部所奏。逮兵馬指揮并巡城御史錦衣衛官校於獄。

成化十年十二月。有自宮者五十餘人。日赴禮部喧訴求進。尙書鄒幹以聞。命錦衣衛執之。枷項於禮部前。并各大市街示衆。

甯晉伯劉祿。成化十年襲父爵。次年三月卒。憲宗以祿幼。且襲爵未久。惟賜祭。不予葬。且免輟朝。命有司著爲令。

成化十一年冬。有自宮聚至四五百人。閤嚷求收用。憲宗云。此輩逆天悖理。自絕其類。且又羣聚喧擾。宜治以重罪。但遇赦宥。錦衣衛其執而杖之。人各五十。押送戶部。如例編發海戶當差。是後有再犯者。本身處死。全家發邊遠充軍。禮部移文天下禁約。

成化十二年二月。朔日食。望月食。

成化時。錦衣衛奏京城內外盜賊生發。前後捕獲七百餘人。其中強盜多係僧人。乞自後僧行道童。不給有司文憑。私自來京者。緝出俱發邊衛。并罪其所主之家。從之。

成化時。九卿以災異陳言。內一款。軍民服色器用。近多僭越。服用則僧大紅織金羅段。徧地錦。騎坐則僧描金鞍。點錢銀鞦韆。首飾則僭寶石珠翠。今四方絲貴金少。率皆坐此。宜嚴加禁約。違者卽重罪而沒入。

之。此修風在今更甚。尤宜禁止。

成化時。大學士商輅因災陳言。內一款。臣聞天下之治亂。係下情之通塞。太祖高皇帝臨御之時。自羣臣以及民庶。於可言之事。許直至御前陳說。所以廣耳目。達下情也。皇上承嗣以來。詔求直言。而人多顧忌。不肯盡言。意者聽言之道未至乎。望明詔在廷羣臣。凡致災之由。彌災之策。悉陳以聞。

成化時。定西侯蔣琬言。養兵之利。莫善於屯田。今竭東南民力。漕運以實京庾。又勞八府民力。飛輓以供邊餉。民兵俱弊。費出無經。屯田之利。則未徧舉。且大同宣府等處膏腴土田。無慮數十萬頃。悉爲豪強占種。租稅不供。稍遇兵荒。全仰內郡。其八府良田。又多爲勢要之家。妄以拋荒奏乞。日漸侵剝。失業之民。控訴無所。脫使邊關有警。內郡何由接濟。運河有阻。京師何所仰給。居安思危。不可不慮。乞令戶部會議。遣剛正給事中御史二員。視往年甘肅增糧事例。檢勘丈量。定著科額。八府民田。亦乞嚴立禁條。不許豪奪。庶幾兵民足食。內外有備。

成化間。戶部覆甘肅巡撫宋有文奏言。邊儲虧折。非獨甘肅爲然。如遼東大同諸處。往往事覺盤究未報。大抵糧儲乃生民膏血。而邊方險遠。類難急致。其間侵盜之徒。率多延緩。以覬脫免。今宜定爲通例。凡盜糧五十石。草一千束。錢帛直銀二十五兩者。仍用常典。多者一如近例。監追充軍。四倍其數。則無間文武職官吏典斗庫部運諸人。雖宥不赦。正犯或有逃故。逮其親屬。如此則糧不重費。人知謹守。疏上。詔如議。且令正犯逃故。於同黨至親家屬追之。

成化時禮部覆轡飭邊備兵部侍郎馬文升奏光祿寺筵宴夷人酒飯非薄憲宗曰宴待諸夷本柔遠之道所以尊隆國體起其瞻仰非但飯食之而已必器具整齊品物豐潔始稱今後筵宴并酒飯處令光祿寺堂上官視之仍以禮部官一員督察有不遵者併治以罪

成化十二年七月京師西城有物夜出傷人其色黑踪跡之不可得上乃於禁中祭告天地曰臣以菲薄之資撫盈成之運顧政事之多缺致災異之薦臻茲者京城內外有物夜出殘害軍民驚動閭巷夫變不虛生必有所自意者或用度不節致傷民財歟或土木頽興過勞民力歟或忠言不聞下情無由上達歟或仁政不施實惠未能下究歟夙夜兢惕罔知攸措伏惟大造垂慈曲賜矜憫赦過宥罪轉禍爲祥俾妖物潛消居人安妥臣當祇謹天戒循省愆尤期維新於政令以圖報於大恩不勝惓惓懇禱之至大學士商輅等亦條上時政闕失請付所司行之當時君臣尙有遇災而懼警惕修省之意

昭德宮內使汪直得寵於憲廟自黑書之後命出外巡察物情直布衣小帽乘驢騾往來京城內外人不之知直刺得外閒隱事以取信於上上益委任遂謗及諸大臣權寵赫奕又委官校四外緝事不拘京官藩臬動皆拘繫西廠或夜入其家搜其財物刑其妻女朝臣惴惴不自安於是大學士商輅及萬安劉珏劉吉上疏極言其害言陛下委聽斷於汪直直又寄耳目於羣小如韋漢王英輩大張聲勢盡衆害人使大臣不安於位小臣不安於職商賈不安於市行旅不安於途士卒不安於伍庶民不安於業因條列其不法事以上謂如此不已國之安危或未可知憲廟從其言爲罷西廠責汪直退還本監調章瑛邊衛差

操散遣諸校尉。人心快之。然帝意猶未釋然。會御史戴縉以九年滿不得陞。窺知意旨。遂上疏言。皇上近以災變。敕令臣工修省。未聞有進賢退不肖革弊釐奸者。獨太監汪直。緝奸惡。懲貪賊。釋冤抑。禁宿弊。皆合公論。而服人心。假建言之名。以頌直功德。疏成。先以草託直所厚錦衣千戶吳綬。示直。令直先爲言於帝。而後奏之。疏奏。帝大悅。於是直復開西廠。詞察益苛。破家毀族。人不堪命。縉意望陞都御史。乃止。得尙寶少卿。

鄉試小錄前。舊有吏典掌行科舉及生員謄錄對讀二條。成化十三年。以少詹事黎淳言。始消去之。淳又言。士子有文理差錯。行文有疵。表失平仄。字畫差錯者。皆宜究治。禮部覆議。平仄不順。字畫差錯。與文理差繆者不同。宜仍令會試從之。

中外軍政官五年一次考選。舊無著令。成化十四年春。因兵部尙書余子俊。英國公張懋奏請始定。成化十四年八月戊申。早朝。東班官若聞有甲兵聲者。因辟易不復成列。衛士露刃以備不虞。久之始定。究其事所從起。莫能得。亦異矣。

翰林院官自永樂宣德以來。俱不習儀。至成化十四年冬至日。錦衣緝事者奏。學士王獻等不赴習儀。憲廟命鞠問。二人舉相傳之例以聞。宥之。仍詔自今行大禮。仍先期習儀。惟內閣辦事者免。

舊制。頒歷在十一月朔。成化十五年。是日值冬至。禮部預以爲請。命改頒歷於十月朔日。

成化十五年。太子少保戶部尙書楊鼎乞致仕。特賜敕允之。仍給月米二石。歲夫四名。先是大臣致仕。未

有給米撥夫例。有之自鼎始。

成化十六年。以監生虎臣言。始詔天下學校。孔子廟庭所在。凡過其門者。皆下馬。

官吏折俸布。舊於甲字庫折支者。每闊白布一匹。折米四十石。成化十六年。戶部以爲言。始改折三十石。然布極細者。不過值銀二兩。而米遇貴。石值銀一兩。已有懸絕。後又以粗縣布值銀三四錢者支與。是粗布一匹。准價銀三十兩矣。從古所未有也。

成化十七年。國子監丞祝瀾。請天下文廟。皆宜用木主。禮部覆言。廟制已定。而瀾欲紊亂舊章。遂黜爲雲南廣西府經歷。後竟用木主。而無人爲瀾白其事者。

舊制給事中外陞。必方面知府。無府州佐貳者。成化十七年五月。禮科都給事中張鐸。兵科給事中蕭顯。因言事件旨。吏部希意。陞鐸爲湖廣漢陽府通判。顯爲貴州鎮甯州同知。時鎮甯州無同知。特添設以授之。

舊例指官詐財滿貫犯。該徒流以上罪者。俱發充軍。有大誥及遇恩。例減二等。爲首從者。止得徒杖之罪。成化十七年五月。內刑部題。此輩情犯頗重。如復減等。恐奸僞日滋。請今後指稱京官并三司以下官名。及以官府使用爲詞。誣財者。俱計贓。不分首從。悉連家屬發邊衛充軍。原係邊衛者。發極邊守哨。從之。都御史李綱。山東長清縣人。居官廉介。爲太僕少卿時。曾於冀州遇盜。奪其篋。將啓之。問其隸。知爲綱。曰。乃李少卿耶。是無錢。不啓篋而去。

成化十四年巡撫甯夏都御史賈俊奏邊儲無措請開納銀十三道御史言堂堂天朝富有四海供輸貢入不可數計使能量入爲出用一省百則邊儲何患不充軍需何患不足而爲此賣官鬻爵之事伏乞痛革前弊別爲經久常行之策務使邊備不乏名器不濫舊章不紊異議不生疏上憲宗曰漢文帝從晁錯備邊之策令民納粟拜爵後人情其作俑邇者有司以乏邊儲又議行納銀事例後世又將謂何御史所言是也宜一切罷之勿行

成化時兵部尙書余子俊以京城內外多盜請差府部屬官五十餘員會錦衣衛巡城御史查究內外官民之家有舍匿游民及無籍軍匠罪囚者各聽首實送戶工兵三部收役若經赦死囚遣而復來者處死鄰居舍匿之家蔽占不舉者亦以其罪坐之仍令審編火夫坐鋪巡警夜以五十人爲率獲盜必追究舍匿之家概治之及印子鋪賭場俱宜禁治自令犯者其房舍沒官治以重罪

成化十七年秋禮部言烏思藏地方在長河西之西長河西在松潘越巂之南三處地界相連易於混淆難以辨別烏思藏大乘法王闡教闡化輔教贊善番王舊例三年差人一朝貢後因道險少來而長河西番僧往往僞作印信番書以冒賞賜乞立爲定制除大乘法王無地土外闡教等四王人各賜敕一道勘合二十道該貢之年道經四川陝西比號旣同仍有王印奏本方許放入其長河西魚通甯遠等處朵甘及董卜韓胡諸宣慰司亦各給勘合六十道其入貢道經四川比號驗放一如例若該貢之年偶值道梗不通後不許補貢其四川松茂州土著番僧來朝者邊官亦照例驗放不許過多從之

四川巡撫都御史孫仁以松潘賊劫掠欲發兵剿之憲宗曰兵猶火也不戢將自焚松潘賊已嘗剿戮其渠魁亦知警矣若又縱兵恣殺彼番寨蟬聚豈能悉滅哉貪功以啓邊釁誠非計宜令仁等乘兵威方振之餘遣人撫諭果負固不服乃用兵勦之未晚也

成化十八年山西巡撫都御史何喬新以按察司官延滯詞訟劾僉事尙敬等罪憲廟言刑獄重事也周書曰要囚服念五六日至子旬時特言未得其情者詳審不苟如此苟既得之不卽結斷枉桎繯糾拘繫其身往往有戾死獄中者矣夫其人罪不至死而死是刑官殺之也故律特著淹禁罪囚之條喬新劾奏甚當其卽究治其人仍令天下刑官皆知所謹以副朕欽恤之意

成化十八年十二月通州右衛軍餘金鳳等三百九十一人自宮以求進都察院言中三百十四人俱年及十五歲法當收贖五十九人纔十歲以下乃其父兄教令爲之者當坐教令之人因奏近例凡自宮者本身處死全家發煙瘴地面充軍今犯者衆并援例上請奉憲宗聖旨金鳳等百九十八人枷項示衆滿一月仍杖一百并年幼者俱如擬皆發原籍原衛收管

晉甯河王府自成化十七年以來每夜有妖見或爲神像或爲王侯需索酒食時舉火將焚宮十八年十二月十八夜果焚府第無遺冠服器用皆盡妖亦隨滅其事甚異

成化十九年三月內官王鈿奏令家人中河東鹽二萬餘引戶部請治其罪憲廟曰祖宗之制內官不許私置產業矧敢違例中鹽與民爭利且其服食之需皆自內給今鈿營利於外將焉用之戶部其查例揭

榜禁約。後有犯者。必罪不宥。

太監汪直倚恃權勢。凌轢有司。所過動遭捶撻。嘗至定州。知州裴泰預爲饌具以待。僕從皆醉飽欣欣。直心識之。至成化十九年六月。以罪調南京御馬監。所經有司皆避。直困臥公館。孤燈熒然。適泰以公事至。直喜求食。泰以所攜設饌。遂爾汝待之。直曰。吾非復前比矣。明發得車馬起程足矣。泰曰。諾。至明趨騎而去。聲勢寂然。小人得喪之態。可爲世戒。

故事。章奏既得旨。諸司抄出奉行。亦互相傳報。使知朝政。自成化時。汪直用事。其黨千戶吳綬以爲漏洩機密。請禁之。後之奸人。恐不便己私。遂往往禁諸傳報者。然卒未有不傳。亦可笑矣。

成化二十年。英宗忌辰。憲宗顧左右曰。今早行禮之際。追念罔極之恩。感傷於懷。泫然淚下。不能自己。永惟先皇奄棄天下。臣民忽已二十年矣。朕嗣守大業。兢兢慄慄。恆懼弗克負荷。無以慰宗廟神靈。今益當省身修德。任賢圖治。使四海無虞。生民樂業。庶幾無愧天子之孝云爾。

慶成大禮。國家以來。不肯輕廢。成化二十年正月。御史徐鏞。何珙。以京師地震。疏請免宴。憲宗謂慶成宴。乃祖宗定制。責二人不諳大體。調外任。

成化間。京城內外奸惡之徒。行凶害人。荒淫賭博。甚至占人妻女。爲人報讎。憲廟因錦衣衛官奏謂之曰。昔漢郭解一豪俠之雄耳。武帝因公孫宏之言。殺之以懲不逞。論者謂其有關治體。今羣惡少相倚爲奸。恐將來效尤者。無所不至。宜榜禁之。仍令保伍互相覺察。知而不告者。各治以罪。

成化二十一年五月。陞御史汪奎於夔州府。都給事中盧瑀於長沙府。各通判。給事中童祝於興國州。秦昇於廣安州。各同知。諸人因災異。言事切直。吏部承密旨。陞之。亦陞遷之變例也。

成化二十一年九月。忽一日。申刻。太監覃昌傳旨。召大學士萬安。劉吉。赴西角門。劉翊亦欲往。昌止之。安等至。昌出紙一緘。上有御筆硃書一封字。啓視。則人訐翊貪財好色。與太監某認親。納王越賄。謀與復爵。諸陰事。安等驚曰。此卽匿名文書。朝廷何不火之。召安等看何爲。昌曰。聖意不可回。二先生不作計處。明日行事。本發出。則無及矣。安等曰。必不得已。翊親老。俟親終守制。何如。曰。不能待也。曰。不然。令其自陳。休致。厚加恩典。以全君臣始終之義。昌曰。上意正如此。翌日。翊本進。遂准致仕。加歲夫月米。賜敕而遣之。每視朝時。天威在上。羣臣敬慎之極。語言進退之間。不無小小差誤。非敢慢也。成化二十二年四月。憲廟諭御史等官。今後通政司鴻臚寺等官。宜讀奏詞。有差錯一二字者。免劾。眞聖人之度也。

副都御史屠浦。歷三品俸二年餘。四月。陞右都御史。又歷三品俸八月。疏乞以今所歷足前所歷。共計三年。請給三品誥命。以封父母。許之。

成化二十二年九月。詔天下有司徵稅。毋取餘價。

舊例。會試舉人以百名爲率。南數取五十五名。北數取三十五名。中數取十名。成化二十二年十一月。當會試之前。時內閣萬安。禮部尙書周洪謨。俱四川人。四川左布政潘楨。卽希二人意。言額數不均。於是南北各退二名。中卷多增二名。

成化二十三年二月初七日。上丁。當祭先師孔子。以初六日命皇太子親迎。傳制遣官改用次丁。成化二十三年五月。保定府東鹿縣昏刻。天地昏黑。空中聲如雷。尋有黑氣墜地。掘之得黑石二。一如碗。一如雞卵。

成化二十三年八月。甯王奠培以皇太子婚禮成。遣官表賀。其表文中稱大婚。憲廟言婚禮不賀。人之序也。今庶民之家尚不行此。況朝廷乎。王不據理遵例。乃遣人奉表來賀。雖云致敬。所謂事之不以禮也。況表中又不審輕重。謬稱大婚可乎。宜降敕諭王。俾知此意。仍令巡按御史逮治長史等官。

成化時。真定知府余瓚言。陝西山西大同宣府遼東等處。邊牆內地土肥饒。近皆爲鎮守內外等官。私役軍士。盡力開耕。所獲糧草甚富。凡遇官民買納。加倍取息。以此觀之。則各邊所出者。皆足各邊之用矣。請敕遣科道部屬官。剛正有爲。深達大體者數員。往會巡撫。巡按鎮守內外等官。勘視。凡堪種熟地。係軍民并千百戶以下者。聽如舊管業。其在指揮以上者。請定則例。量撥多寡以資其用。餘皆計常操官軍若干。隊分撥。每人宅地二畝。田地二十畝。每隊分爲兩班耕守。以備征操。亦但徵取十一。則民可免轉輸之勞。軍可無饑寒之苦矣。

京城外有軍民業。圯斬驚等。發人墓。取髑髏及頂骨。以爲萬巴剌碗并數珠。假以爲西番所產。乘時市利。愚民競趨之。所發墓甚衆。至是緝事者聞於朝。番僧嘗買以進者皆遁去。獲卽等送刑部鞠治。得其黨俱坐斬。